

Selasa, 13 Julai 2021, 12:13pm

Pelajar IPT dibenar pulang bercuti

Julai 9, 2021 @ 8:44pm



Pelajar IPT dibenarkan pulang sempena cuti semester bermula 12 Julai ini. FOTO NSTP

PUTRAJAYA: Pelajar institut pendidikan tinggi (IPT) dibenarkan pulang ke rumah masing-masing sempena cuti semester 2020/2021 mulai Isnin ini.

Kementerian Pengajian Tinggi (KPT) berkata, mekanisme kawalan pergerakan pelajar dilaksanakan secara berfasa iaitu bagi fasa permulaan, hanya pergerakan pelajar tidak tertakluk Perintah Kawalan Pergerakan Diperketatkan (PKPD) dibenarkan.

"Pergerakan pelajar dalam kawasan PKPD hanya dibenarkan selepas tempoh PKPD tamat," kata kenyataan itu, hari ini.

Cuti semester IPT bermula 12 Julai ini sehingga Oktober depan.

KPT berkata, bagi pelajar yang pulang ke Wilayah Persekutuan Labuan, Sabah dan Sarawak, kos ujian saringan Tindak Balas Berantai Polimerase (RT-PCR) ditanggung sepenuhnya kerajaan manakala kos kuarantin ditanggung kerajaan negeri masing-masing.

Katanya, kaedah pergerakan sehala ditetapkan iaitu menggunakan pengangkutan bas diselaraskan IPT masing-masing dengan pematuhan prosedur operasi standard (SOP) ketat.

"Penggunaan kenderaan sendiri oleh pelajar dibenarkan manakala ibu bapa atau penjaga pula tidak dibenarkan merentas negeri untuk membawa pelajar pulang," kata kenyataan itu.

KPT berkata, kebenaran untuk pelajar IPT pulang ke rumah sempena cuti semester itu dipersetujui dalam Mesyuarat Sidang Khas Majlis Keselamatan Negara (MKN), semalam.

Perincian mengenai pergerakan pelajar boleh dirujuk pada SOP Pelan Pemulihan Negara (PPN) dan Soalan Lazim Pergerakan Pelajar Pulang bagi mendapatkan maklumat lanjut.

Pihak berkenaan juga boleh menghubungi Bilik Gerakan COVID-19 KPT di talian 03-88706777 dengan sambungan 6949/6623/6628, menerusi laman web IPT atau berurus dengan Pegawai Penyelaras di IPT masing-masing. - BERNAMA